

SAMIR LEMEŠ

Dobar dan pozdrav svim prisutnim, prije nego što postavim pitanje samo, ovaj jedna molba. Jesu li još uvijek ovdje iz ove firme koja je softver pravila da nam promijene ovu stranačku pripadnost ovdje. To smo i prošli put rekli pa su možda zaboravili. Ovako ja imam jednu inicijativu i jedno pitanje. Poslanička inicijativa koju upućujem zajednički Ministarstvu obrazovanja sa pedagoškim zavodom, Ministarstvu zdravstva sa Zavodom zdravstvenog osiguranja i bolnicama u ZDK. O čemu se radi? Pokrećem inicijativu za uspostavljanje programa škola u bolnici u bolnicama ZDK. Djeca koje njihovo zdravstveno stanje prisiljava da borave u bolnici duže periode vremena 15, 30 pa i više dana nisu u stanju savladati gradivo propisano nastavnim planom i programom tako da po povratku u školske klupe iako iscrpljeni dugim liječenjem moraju uložiti dodatne napore da nadoknade gradivo i sustignu svoje vršnjake. Takvim učenicima se često iz sažaljenja gleda kroz prste pa dobiju pozitivne ocjene iz samilosti, a ne zato što su uspješno savladali gradivo. U kasnijem školovanju to se odrazi na slabiji uspjeh jer se gradivo posebno iz temeljnih predmeta poput matematike i maternjeg jezika nadovezuje na prethodno usvojena znanja. Projekat škola u bolnici koji se već uspješno provodi u nekim bolnicama u Hrvatskoj pa čak i u Kantonu Sarajevo. Podrazumijeva da se organizuje nastava na bolničkim odjelima tako što se za to angažuje učitelj i razredne i predmetne nastave, učenje se maksimalno prilagođava zdravstvenom psihofizičkom stanju djece i pri tome se primjenjuju savremene nastavne metode, sredstava i oblici rada. Osmišljavaju se poticajne aktivnosti za učenike kako bi na bolničkim odjelima postigli toplu i vedru atmosferu kao što je obilježavanje prigodnih datuma, rođendanske proslave i pozorišne predstave, kreativne radionice itd. Djeca sa malignim bolestima posebno se raduju tim aktivnostima jer im one skreću pažnju s bolesti. Škola u bolnici uvodi se da bi hospitaliziranoj djeci olakšalo odvojenost od obitelji i socijalne sredine i umanjila stres od boravka u bolnici, da im omogući kontinuitet u usvajanju nastavnih sadržaja, da im dan u bolnici učini zanimljivijim kraćim i sadržajnijim, da im omogući što lakšu reintegraciju u matičnu školu nakon povratka iz bolnice, itd., itd. Škola u bolnici doprinosi djetetovom samopouzdanju i stvaranju pozitivne slike o sebi. Zakonsko uporište za ovakav projekat već postoji jer u Zakonu o osnovnoj školi ZDK član 19. je propisano da učenik u osnovnoj školi koji se liječi u bolnici iz tog razloga ne može pohađati nastavu u školi gdje je registriran adekvatno prilagođeno obrazovanje će biti pruženo u bolnici odnosno u zdravstvenoj ustanovi. Međutim ta se zakonska odredba koliko ja znam ne primjenjuje niti je donesen propis koji ovo reguliše iako je zakonom rečeno da treba donijeti taj propis. Početkom naredne školske godine kanton se suočava sa viškom nastavnog kadra zbog smanjenja mlađe populacije. Nažalost, odličan način za zbrinjavanje tehnološkog viška bili bi ovakvi projekti, stoga podnosim ovu inicijativu prema već nabrojanim institucijama kako bi se eventualno prilagodili propisi koji bi mogli biti smetnja ili prepreka za realizaciju projekta npr., priznavanje ocjena iz bolnice obezbjedila sredstva za finansiranje te izvršila stručno osposobljavahe nastavnog kadra, a realizaciju ovakvog programa. To je inicijativa.